


FIRST EDITION

BIBLE
TRANSLATION
AND LITERACY

KITHOOMO KIA NDIINI

IBUKU RIA KIRACHIKAMBERE 1



Îbuku ria Mûrutwa

NDIINI ÎBUKU RÎA MÛRUTWA WA KÎRACI KÎA MBERE

1

**Standard
1
Book**

**CRE Book
In Tharaka Language**

Written by: Tharaka MTE Writers panel

Compiled by: Tharaka MTE staff

Edited by: Joseph Mbijîwe & Patrick Kanampiû

Illustrated by: Mûkabi Matî, Joseck Mûtethia, Joseph Mbijîwe & Mûtîria Cingaû

First Edition, 2011
ISBN: 9966-00-219-7
Published
By
BTL (E.A.)
P.O Box 4445 Nairobi, Kenya
© BTL, 2011

**Funded by: Canadian International Development
Agency
(CIDA)**

PREFACE

This Standard 1 CRE Pupil's Book is written in accordance with Standard One Syllabus. The Book is divided into 13 units. Each unit deals with a major topic. These 13 main topics that this book covers are; ***Creation- Myself, Our Family, Holy Bible, Christmas, Church, Prayer, Obedience, Work, Jesus: The Son of God, Acceptance and Trust, Concern and sharing, Friendship, and the Passover.*** The topics are divided into sub-topics and the various topics are further sub-divided into lessons.

This book was written to help teachers in Tharaka lower primary schools in teaching CRE using Kîtharaka as a medium of instruction. This is in line with requirement of the Ministry of Education that pupils in lower primary schools learn in the language of the catchment area.

This book and others in this series are culturally relevant to Tharaka children. They are not only written in Kîtharaka but they use examples familiar to Tharaka people.

This is pupil's book. There is a teacher's guide that has instructions to the teacher on how to disseminate the contents of this pupil's book to the learners.

I would like to appreciate and acknowledge the contribution by various partners in developing this book and others in Kîtharaka series. Among these are Tharaka MTE Writers Panel; comprising Education Officers- Mr. Joseph Mwenda, Mr. Alex Kanampiu, Mrs. Ann Kieria, Mr. Peter K. Muchiri and Mr. Onesmus Mitambo; Primary School Teachers- Mr. Mûthengi Gaichu, Mr. Isaiah Gwatia, Mrs. Grace Ngoci, Mr. Isaiah Rubane, Mr. Gerald Murithi, Mr. Simon Kithiriki, Mr. Moses Kirimi, Mrs. Eunice Mayira, Ms. Tabitha Munda, Mrs. Esther Karauki, Mr. Ginson Miriti Mrs. Jennifer Makia, Mr. Delfino M. Mwaria, Mr. Zaverio M. Rugia and Mr. Stephen K. Murea; BTL Tharaka staff, Tharaka South and Tharaka North District Education Officials, our funding partners, Bible Translation & Literacy (E.A.) and our other various partners.

I most sincerely thank all those who took part and gave all manner of support in the development of this book.

God bless you all.

Onesmus Kamwara
BTL Tharaka Project Leader

KÎMENYITHIA

Îbuku rîrî rîa Ndiini ria Kîraci Kîa Mbere rîandikîitwe rîkithiingatagiira sîrabasi ya Kîraci kîa Mbere. Rîgaûkanîitue icuncî 13. Na wa kîra gîcuncî kîrî na kithoomo giakîo. Ithoomo bira birî îbukuuni rîrî i; *Ôumbi- Niû, Mûciî wetû, Bibiria i Ntheru, Thigûunkû ya güciarwa kwa Yiesû, Kanica, Maroomba, wathîki, wîra, Yiesû Kîristû mwana wa Ngai, Gwîtigiîrika na Gwîtigîka, Kûringithua na kûgaana into, Ûrutwa, Yiesû mwana wa Ngai.*

Ithoomo bibi ibigaûkanîitue biauma reeconi inyiingî.

Îbuku rîrî rîandikirwe rîa güteetheeria aarimû ba iraci bia mwambîrio bia cukuru cia Tharaka kûrutana bagitûmagîra rwaria rwa Kîtharaka. Ügu i kûriingana na watho bwa rwong'i rwa Kithoomo atî aana ba iraci bia mwambîrio babatîirue barutanwa na rwaria rûra rwaragua n'antû ba bantû agu cukuru iîrî.

Îbuku rîrî na mara mangî marî mûbangooni ûyû ma Kîtharaka maandikîtwe bûra mwana wa Tharaka aûmba kûmeerewa bwega mûno. Maandikîtwe na rwaria rwa Kîtharaka na magûtûmagîra ngerekano cia mantû mara antû ba Tharaka bamenyanîritie namo.

Rîrî n'îbuku rîa mûrutwa. Kûrî na îbuku rîa mwarimû rîra rîrî na mataaro kîrî mwarimû ma kûmwonia bûra aûmba kûrutana mantû mara marî îbukuuni rîrî .

Ingûcookia nkaatho kîrî antû bara bateetheereetie kwandika îbuku rîrî na Mabuku mara mangî ma mûbango ûyû wa Kîtharaka. Nabo i bo; Gîkundi kîa aandiki ba Kîtharaka; nabo n'amwe na, anene ba kithoomo- Mr. Joseph Mwenda, Mr. Alex Kanampiu Mrs. Ann Kieria, Mr. Peter K. Muchiri na Mr. Onesmus Mitambo; aarimû -Mr. Muthengi Gaichu, Mr. Isaiah Gwatia, Mrs. Grace Ngoci, Mr. Isaiah Rubane, Mr. Gerald Murithi, Mr. Simon Kithiriki, Mr. Moses Kirimi, Mrs. Eunice Mayira, Ms. Tabitha Munda, Mrs. Esther Karauki, Mr. Ginson Miriti, Mrs. Jennifer Makia na Mr. Delfino M. Mwaria, Mr. Zaverio M. Rugia na Mr. Stephen K. Murea; aruti ngûgî ba BTL Tharaka, anene ba kithoomo ndeeni ya Tharaka South na Tharaka North Districts, antû bara bateethagîria na mbia, BTL na bangî baingî.

Ingûcookeria antû bonthe bara bateetheereetie wandikî bwa îbuku rîrî nkatho inyiingî mûno.

Ngai abûthaarime bwinthe,

Onesmus Kamwara
BTL Tharaka Project Leader

FOREWORD

BIRA BIRÎ KU (CONTENTS)

GÎCUNCÎ KÎA MBERE: Kûgwûrîrwa	1
Ûumbi.....	1
GÎCUNCÎ KÎA BIÎRÎ.....	14
Mûciî wetû.....	14
GÎCUNCÎ KÎA BITHATÛ: Bibiria î ntheru.....	
.....	19
GÎCUNCÎ KÎA BINA.....	22
Thigûûnkû ya gûciarwa kwa Yiesû.....	23
GÎCUNCÎ KÎA BITAANO: Kanica	34
GÎCUNCÎ KÎA BITHANTHATÛ.....	42
Maroomba.....	42
GÎCUNCÎ KÎA MÛGWANJA.....	45
Waathîki.....	45
GÎCUNCÎ KÎA BINAANA.....	58
Wîra.....	58
GÎCUNCÎ GÎA KEENDA.....	68
Yiesû Kîristû mwana wa Ngai.....	68
GÎCUNCÎ GÎA ÎKÛMI NA KÎMWE	96
Kûringithua na kûgaana into.....	96
GÎCUNCÎ GÎA ÎKÛMI NA BIÎRÎ	106
Ûrutwa.....	106
GICUNCÎ GÎA ÎKÛMI NA BITHATÛ....	115
Yiesû mwana wa Ngai.....	115

GÎCUNCÎ KÎA MBERE: Kûgwûrîrwa

KÎONGO GÎA KÎTHOOOMO: Ûûmbi.

Kwambîria.

Kîra muntû n'eebiyî wengwa.

N'eebiyî wegua i muntû mûrûme kana i
mûka.

Kîra muntû n'eebiyî na riîtwa rîake
wengwa

A. Niû

Riitwa riakwa

Thooma 1 Samweri 3: 10

Mbîtagwa Mûtegi. Niû ndî kaîyî. Ndeetirwe

Mûtegi n'ûntû riitaagwa aarî mûtegi wa

mîatû.

Ndî na ûkûrû bwa mîanka îthanthatû.

Mbîtagwa Kayîra. Niû ndî kaarî.

Ndeetirwe Kayîra n'ûntû ndaciariîrwe

njîraani taata athiîte cibitaarî. Ndî na ûkûrû

bwa mîanka mûgwanj



Kayîra

Mûtegi

Ngai ambiyî na riîtwa rîakwa. Incookagîria

Ngai nkaatho n'ûntû n'ambûmbire na

n'ambiyî na riîtwa rîakwa.

Ngai aiyî antû bonthe na mariîtwa maa.

(Wîra ya) biûria.

1. Mbîtagwa

2. Niû ndî _____(Kaîyî, Kaarî)

3. Ndî na ûkûrû bwa mîanka

4. Baaba eetagwa

5. Nthoomaga kîraci kîa

B.Tûcuncî twa mwîrî wa muntû.

Thooma: Kîambîrîria 1: 26-27,

1 Akorintho 12:14-26

Mwîrî wakwa ûrî na tûcuncî mwanya
mwanya.


Ngai aambûmbire na tûcuunci twingî twa
mwîrî ta:-

- meetho, matû, njara, magûrû, kîongo,
kîbara, na tûngî twingî

Ngai aatûumbire na mûbuanaano wake.

Ngai n'atwendeete na i kîo gîtûmi
aatûumbire tûkari t'wee.

Tûcuncî twa nja twa mwîrî



Ngûgî ya kûrûta

- gweta mariîtwâ ma tûcuncî twa mwîrî

twa muntû.

-ina rwîmbo rwa tûcuncî twa mwîrî

ûgîtoongaga tûcuncî

tûtu ûkûgweta.


Rwîmbo:-

Kîongo, ituro, (maru, biara) x3

kîongo, ituro, maru, biara,

meetho, matû kanyua, nyiûrû.

C. Ngûgî cia icuncî bia mwîrî



Thooma: Njakubu 3: 6 – 10

Tûtûmagîra icuuncî bietû bia mwîrî kûruta

ngûgî mwanya mwanya:-

-**Nkingo** n'yakûgwatîira kîongo,

-**magûrû** i ma kûthi,

-**meetho** i ma kwoona,

-**matû** i ma kwîgua,

-nyiûrû n'ya kûnuunkîra na kûbeeба,

-njara i cia kwandîka, kûrima, kûgwata, na
kûruta ngûgî. **-kanyua** i ga kwaaria na
kûrîa.

-kîbara i gîa gûtetheeria gûkamata gîntû

na gûkunîkîra maûri na nkoro

Tûbatîirue gûtûmîra tûcuncî twetû twa

mwîrî kûruta ngûgî imbega.

Wîra ya biûria

Meetho matûteethagia_____

Gweta ngûgî ciîrî cia njara _____,

Twîgagua na

Tûrûgangamaga na tûkathi na

D. Kûmenyeera mwîrî

Thooma: Mathayo 9: 27- 33; Ngûgî 3:11

Tûbatîirue tûmenyeera mîrî yeetû. Ngai

n'akenaga rîra ûkûmenyeera mwîrî waku

n'ûntû n'we

aakûumbire. Njira imbeaga cia kûmenyeera

mwîrî i ta:-

kûthaamba meetho, gûcaaka

magego,gûcanûra ntundu, kûrûûnga

nkunyû, kûthaambia mwîrî

unthe, gwîkîra nguo intheru



nguo intheru

gûcanûra ntuundu



kûthaamba mwîrî
gunthe

kûrûnga nkunyû

Ngûgî ya kûrûta.

Gweta mantû mara ûrûthîte îmuunthî ma

kûmenyeera mwîrî waku.

Wîra ya biuria.

1. Tûthaambaga mwîrî na rûûyî na

2. Tûcaakaga magego na

3. Nkunyû indaaya itûretagîira ____ (irio,
mîrimo)

4. Rûko i ru rûtûmaga (twayûa, tûbaa)

E. Mathûgaania na meciiria makwa

Thooma: Saburî 35: 28, 89: 1, 94: 9–11

Ngai aatûumbire tûrî na mathûgaania na
meciiria meega nkûrûki ya nyamû. I
twoonaga into biingî gûntû kwingî ta
cukuru, mûciî, na njîraani.

Ngai n'atûteethagia kûririkana into na
mantû mara twoonaga. I tûcokagîria Ngai
nkaatho n'ûntû
n'atûririkanagia mantû mara tûkûthooma
cukuru.

Ngûgî ya kûrûta.

Gweta into bira woonaga mûcîî weenu,
cukuru na njîraani gûyîte cukuru.

Wîra ya biûria.

1. Ngai eetire Samweri maita _____

(4, 3, 2)

2. Ngai ampete _____ ma kwonaga.

3. N'ûû ampere magûrû

4. Nkaamenya _____ wakwa.

GÎCUNCÎ KÎA BIÎRÎ.

KÎONGO GÎA KÎTHOOMO: Mûciî wetû.

A. Antû ba mûciî wetû

Thooma: Kuuma 20:12, Kiambîrîria 37:3-

5, 12-14, 25, 28

Mûciî wetû ûrî na antû baingî. Kûri na
baaba, taata, aruayia, aaraayia, ba cûucû,
baaba mwanake, baaba mûkûrû, taata
mwanake, taata mûkûrû na ba abu.

Baba i ba Cûucû, Baaba na Maami, twana
twetû, Baaba mwanake na taata
mwanake na kaana kao.



I ncookagîria Ngai nkaatho n'ûntû bwa
kwîgua ndî na antû ba mûciî (wetû).

Ngûgî ya kûrûta.

Gweta antû ba mûciî wenu na mariîtwa
maao.

Wîra ya biûria.

1. Mbîtaga mûruagina wa maama _____
(abu, cûûcû)
2. Îthe wa maama kana baaba i _____
mûruuaayia cûûcû)

B. Bûra nkarani na antû ba mûciî.

Thooma: Njoana 3:18, Kuuma 20:12,

Kîambîrîria 45:1-4, 12-15

Niû ndî na aciari baîrî. Baaba i mûciari wa
muntû mûrume. Maama i mûciari wa
mwekûrû. Aciari ba baaba na maama i
ba cûûcû. Bara tûciaranîrîtue nabo
n'aruayia na aaraayia.

Aruagina ba maama i bo ba abu.

Aruagina ba baaba i ba baaba mûkûrû na
ba baaba mwaanake.

Aaragina ba maama kana ba baaba i ba
taata mûkûrû na ba taata mwanake.

Aana ba baaba mûkûrû kana baaba
mwanake na ba taata mûkûrû na ba taata
mwanake na ba abu n'aruaayia na
aaraayia.

Ngai n'akenaga rîra tûkwaathîkîra aciaari
beetû.

I ngûcookeria Ngai nkaatho n'ûntû bwa
kûûneenkera antû ba mûciî.

Ngûgî ya Kûruta.

Îra kîraci bûra waathîkagîra aciaari baaku.

Wîra ya biûria.

1. _____ i kîongo kîa mûciî.

(mûruayia, baaba)


2. Tûrî mûciî tûthekanagia na _____,

3. I ncookagîria Ngai nkaatho n'ûntû bwa

kûneenkera _____

GÎCUNCÎ KÎA BITHATÛ: Bibiria ïntheru.

A. Bibiria ta mûgaambo wa Ngai



Îno i Bibiria. Bibiria yandîkîitwe mantû ma

mwanya na mabuku mara maangî.

N'îbuku rîa Ngai.

Tûtûmagîra mabuku mama kûthooma

mbi?

Tûtûmagîra mabuku mama kûthooma

ithoomo

mwanya mwanya ta:-

- gûtara mathaabu, kûthooma na

kwandîka gîicûnkû

na ithoomo bira biingî.

Kûrî îbuku rîmwe rîa mama rîrî na

mûkûûrani na mara maangî.

N'îbuku rîrîkû wendeete kûthooma mûno?

Kûrî na îbuku rîmwe rîrî na mwanya na

mara maangî.

Rîitagua Bibiria î ntheru. Bibiria i kiugo kîa Ngai.

Ngai aaragia naati gûkûrûkîra Bibiria.
Ngai eendaga tûtîya na tûmenyeera
Bibiria.

Thooma na guuge na kiongo Njoana 1:1

“Kiambîrîriani kiongwa, kiugo nwa kîarî oogo, na kiugo nwa gîatûûraga na Ngai,
na kiugo nwa kîarî bûmwe na Ngai.”

B. Bibiria întheru îrî kîoneeria

mîtûûrîreeni yetû.

Mîtûûrîreeni yeetû i twathagwa n'aciaari
beetû bûratûbatîrue gûkara na kûrûtha.
Aaraayia na aruaayia bara bakûrû i

batwaathaga.

Aarimû beetû kana atooongoria ba kanica

kinya bo ibatwaathaga. I tûbathikagîria

na tûkabaathîkîra. Ngai atûneenkerete

Bibiria îtûtongoragîria.

Bibiria îtwîraga mantû ma Ngai. Îtwîraga

bûra tûkaarûtha na kwenda Ngai na bûra

tûgatûûra tûrî eetîgia baake.

Wîra ya biûria.

1. Îbuku rîa Ngai rîitagwa B_ b_ ria

2. Bibiria i k_ ug_ kîa Ngai

3. Bibiria îtûrutanaga kw_nd_ Ngai

GÎCUNCÎ KÎA BINA.

KÎONGO GÎA KÎTHOOМО: Thigûûnkû ya gûciarwa kwa Yiesû.

KÎTHOOМО KÎONGWA: Wendo bwa Ngai kîrî tiigû.

**A. Yiesû Kîrîstû aarî kiegwa kînene
kuuma kîrî Ngai.**

Thooma: Njoana 3:16, Isaaya 9:6-7,

Mathaayo 1: 18 - 24.

Ngai n'atwendeete mûno. N'atweete
biegwa mwanya mwanya ta aciaari na
into biingî.

N'atweere mwana wake wa kîmoomwe,

Yiesû Kîrîstû aaya gûtûkuîra. Yiesû Kîrîstû i

kîegwa kuuma kîrî Ngai.

Yiesû n'atûkuîrîre kaingo tûrekerwa
meeyia meetû.

I ngûkaatha Ngai n'ûntû bwa gûtwaa
Yiesû.



*kagenke Yiesû kamamîtue rûkongorooni
rwa ng'ombe*

Wîra ya biûria.

1. _____ i kîegwa kuuma kîrî Ngai.

(Yiesû, Njoana)

2. Yiesû agûciarwa aamaamiirue

(gîtandaani, rûkongorooni)

3. Gina wa Yiesû eetagwa

_____ (Erisabeethi, maria)

B. Kûneenkera bara baangî biegwa.

Thooma: Aebeeso 4:31-32, 2 Akorintho

9:7

Biegwa n'into bira tweeyagwa twarûtha

bweega.

Twathîka mûciî, aciaari beetû i bakenaga

na bagatwaa biegwa.

Muntû aaneenkerwa kîegwa n'acookagia
nkaatho akauga, "I bwega."

Ngai eendaga tûgaaga into bietû na antû
bara baangî.

I ndûmagia acoore baakwa tûramu tûrî
cukuru.

Ngai n'akenaga rîra tûkweyana into bietû
tûkeneete.

Ti biegwa bionthe biega. Tûtikaathûkagie
biegwa bia antû tûtaiyî.

Gweta biegwa bira gûumba kûneenkera
Muntû akûrûthîra bwega.

C. Gîtûmi gîa kîrîcimaci.

Thooma: Ruka 1:26-38, 2:1-20.

Îgiita rîa Kîrîcimaci tûkenagîira gûciarwa

kwa mwoonokia wetû Yiesû Kîristû.

Tûthiiyaga kanicaani kûromba na kûgonga

Ngai. I tûrîyanagîra biakûrîa na tûkeeyana

biegwa.

Bûra nkaarûtha:-

-ngaakumithia na kûgonga Ngai wakwa.

-nkaagûrîra acoore baakwa biegwa bia

Thigûnkû.

-nkaathi kanicaani gûkûngûira gûciarwa

kwa Yiesû.


D. Antû baûme kûriûngîra Yiesû arî

kageenke:. Thooma: Mathayo 2:1-12

Rîra kaana gaaciarwa antû i bakenaga.

Acoore na atûûri i bathiiyaga gûkoona na
gûkairîra biegwa..

Yiesû arî kageenke



kageenke Yiesû gakiegwa biegwa

Yiesû aaciariirwe taûni ya Bethireemu

gîteere kîa Njudea.

Aaciaarirwe kagiita ka mûnene weetagwa

Eronde.

Agûciaarwa antû bamwe baûme i bathiire

kûmwoona.

Antû babu baatongoreeretue i Nthata. I

baamwirîre biegwa biingî ta - Thaabu,

Macoco na manemane. Yiesû aaciaarirwe

i Maria na Njosebu.

Ngaakumia Ngai ta antu babu baûme.

Wîra ya biûria.

1. Yiesû aaciaarîrwe taûni yeetagwa

2. _____ i bathiire kwoona na kwirîra
kageenke Yiesû biegwa.

3. Yiesû aareteerwe biegwa ta _____,

_____ na _____

4. Yiesû agûciarwa aamaamiirue

E. Gwîtîgîria biegwa bia bara baangî.

Antû beeyanaga biegwa n'ûntû bwa
wendo.

I tûkenagîira biegwa na gûcookia
nkaatho kîrî bara batweeyaga.

Ti bwega kûthûkagia biegwa kuuma kîrî
antû tûtaiyî.

Biegwa bimwe ta Ncoobi, Thigara, na

baangi ti biega

Kiegwa kîega kuuma kîrî Ngai i Yesû
Kîrîstû.

Aayire gûtûrekera meeyia meetû.

Aana bakiegwa biegwa mwanya

mwanya



Gitonga na Karîmi i bakwegwa biegwa

cukuru

n'ûntû bwa kwathîka na kûrûtha bwega.

Ngûgî ya kûruta.

Uga biegwa bira waroreeterwa n'acoore.

Wîra ya biûria.

1. Biegwa bira tûtabuîrîte kûthûkia i ta:

_____ , _____ ,

2. Ngaiaatweere _____ arî kiegwa
kîega.

3. Ti bwega kûthûkia kiegwa kuuma kîrî

(acoore, antû tûtaiyî)

GÎCUNCÎ KÎA BITAANO: Kanica

A: Gûcookia nkaatho.

A. Ntugû cia rûûtha


Cukuru ciaingwa tûthiyaga rûûtha.

I kwîgagua kûrî na ndûûtha ciingî cia
gûkeneera mantû mara maarûthîkire
nthigûrû yetû ta:-

- ntugû ya Mashujaa, Njamuurî, na

Mandaraka

- Ncuma mooci na Ncuma piiri i kwîgagua
kûrî na rûûtha rwa kûnogoka.



Gîtonga n'athiyaga kûrîthia rîra arî mûciî.

Rûûtha rûthiru rûra rwaarî mweri wa
mwirîingo, Kîyogi na mwaragina Karîthi i
baatumîte marîthia. Ntugû ïra muntû
ataarîthîtie aathiiyaga kûgwatia aciaari
ngûgî cia mûciî kana kinya kûthi kûrima
mundaani.

Ereeca bûra watûmîire rûûtha rûthiru.

Yiesû n'aatûmîre rûûtha rwake bweega.

Aathiire Njerucaremu kanicaani.

Ngai n'eendaga tûmûcookeria nkaatho

n'ûntû bwa bira bionthe atûneekerete.

Tûbatîirue gûcookia nkaatho n'ûntû bwa

ntugû cia rûûtha.

Bûra nkaarûtha.

1. Ngateethagia aciari ntugû cia rûûtha.

2. Ngacookagîria Ngai nkaatho n'ûntû bwa
mantû monthe.

B. Anna aacookeria Ngai nkaatho.

Ncuma taano nthiru Karigû n'airirwe

Gatûnga kûgûrîrwa nguo i gina. Karigû

n'aagûrîrwe îriinda rîthoongi mûno.

Gûtirî kaana kaangî kaarî na îriinda ta rîru

ntûûra yao yonthe. Karigû n'eerire gina "I

bwega maama."

Bibiriani tûthoomaga rûgono rwa

mwekûrû eetagwa Anna. Anna aakarîte

mîanka i miingî mûno atoona kaana.

Mûkûrû wake eetagwa Erikana.

Anna n'aaroombire Ngai mûno na

aaneenkerwa kaana ga kaiyî.

Anna n'aacookeerie Ngai nkaatho. Anna

n'aathûkiirie kaana gaku gaake Samweri
akaira kanicaani gûtûmîkaga ku.

Bûra nkaarûtha.


1. Nkaroombaga Ngai n'ûntû bwa
moobatu maakwa.
2. Ngacookagîria Ngai nkaatho magiita
monthe n'ûntû bwa mantû monthe.

Wîra ya biûria.

1. Anna aarombire Ngai amwee
-

2. Ndaarûthîrwa bweega mbatîrue mbuga
i _____
 3. Kaana ka Anna geetagwa
-

C. Gûookia nkaatho n'ûntû bwa biegwa bia Ngai.



Ngûgî ya kûruta

Gweta into bira ûkwona mbicaani ino.

I Ngai aûmbire into ta bibi ûkwoona

mbicaani. Birî gîtumi kîrî antû. Ngai

aûmbire bionthe n'ûntû bwetû.

Bimwe i bitûkenagia. Bimwe i bitohoongi

bikionwa na meetho.

I tûbatîrue tûbimenyeera bionthe.

Ngai eendaga tûmûcookagîria nkaatho
n'ûntû bwa into bionthe bira
bitûthiûrûkîrîte.

Bûra nkaarûtha.

1. Ngaacookagîria Ngai nkaatho n'ûntû
bwa into
bionthe bira bitûthiûrûkîrîte.

2. Nkamenyagîra into bibi Ngai aûmbire

Ngûgî ya kûrûta.

1. Gweta into bira bithiûrûkîrîte mûcîi
wenu.

2. N'ata ûumba kûbimeneera?

Wîra ya biûria.

1. Gweta into bithatû bira Ngai aûmbîte

2. Yiesû aathiire Nj_r_s_r_m_ îgiita rîa

rûûtha.

GÎCUNCÎ KÎA BITHANTHATÛ.

KÎONGO GÎA KÎTHOOOMO: Maroomba.

Thooma: mathayo 6:9-13, Ruka 18:1

Twaaragia na Ngai na njîra ya maromba.

Rîra tûkûromba i rîo twîraga Ngai thîna

cietû na tûkamûcookeria nkaatho n'ûntû

bwa mara atûrûthîrîte.

Kûromba i gûtûreetaga akubî na Ngai.

Ngai n'athikagîiria maromba meetû.

Na n'acookagia maromba meetû.

Yiesû n'aarutanire arutwa baake îromba

rîa Mwathani.

Bûra nkaarûtha.

Nkathooma na mbuge îromba rîa
Mwathani.

A. Îromba Rîa Mwathani.

Baaba wetû ûra ûrî îgûrû,
Rîitwa rîaku rîgongagwe.
Ûnene bwaaku bûuye,
Kwenda gwaku kûrûthawe gûkû nthîgûrû,
ta bûra kûruthagwa îgûrû.
Tweyage irio bia gûtûgana.
Tûrekagîre mabîtia meetû,
ta bûra tûrekagîra bara batûbîtagîria.
Ûtikaareke tûthûngîra magerioni,

tûtuunyûkagie ûra mûthûuku.

N'ûntû ûnene, inya, na mwago i biaku
tene na tene. Aameni.

Ngûgî ya kûrûta.

Uga îromba rîa mwathani.

Wîra ya biûria.

1. Twaragia na Ngai gûkûrûkîira

(maroomba, thimû)

2. N'ûû warutanire îromba rîa
Mwathani? _____

3. Tuugaga baaba wetû ûra arî

(nyoomba, îgûrû)


4. Ngai n'atûrekagîra _____ meetû.
(meeyia, mathee)

GÎCUNCÎ KÎA MÛGWANJA.

KÎONGO GÎA KÎTHOOМО: Waathîki

:

A. Waathîki i mbi?



Raitha mbica inû. N'ata aana baba
bakûrûtha?

Aana i bagûciata na gûcengia. I twana
twaathîku.

Saûrû aarî mûnene. Ndauti
n'amwaathîkagîra.

N'amwinagîra rîonthe. Ngai n'aakenaga
rîra tûkwaathîka.

Kwaathîka i kûrûtha bûra tûkwîirwa
tûrûthe. Ngai n'akenaga twaathîka.

Bûra nkaarûtha.

Nkaathîkîra Ngai.

Nkaathîkîra aciari baakwa

Nkaathîkîra aarimû.

Wîra ya biûria.

1. _____ n'aathîkagîra Saûrû. (Ndauti,
Saûrû)
2. Nwa mwanka twaathîkîre ac-ar- beetû.

B. Yiesû n'aathîkire.

Aciaari beetû i bakenaga mûno twaruta
ngûgî ira batweeyaga.

Twathîkagîra aciaari beetû na njîira ya
kûbateethia kûrûta ngûgî ta:-

Kûrîma, Kûrîthia, Kûgwaata mwana,

Gûtaa rûûyî,

Kuuna nkû, Kûrira na iîngî inyiingî.



Yiesû n'aatethagîria îthe gûtuma na
mbaaû.

N'akûneenkeeria îthe rûbaaû rûra amwîtia
atûmîra.

Yiesû n'aathîkagîra aciari baake. Yiesû na
îthe Njosebu
baarutaga ngûgî barî amwe. Baatumaga
itî, meetha na itaanda.

Yiesû n'aathîkagîra Ngai.
Ngai n'akenaga rîra tûkwathîka.

Bûra nkaarûtha.

-nkaathîkagîra Ngai.

-nkaathîkagîra aciari.

Wîra ya biûria.

Yiesû n'aateethagia _____ (Ngai, Îthe)
gûtuma na
_____ mbaû, ndara)

C. Gütîya na kwathîkîra aciaari.



Kagwîra n'akûthaambia into îndî Kînyua
wee atwete mwembeni îgûrû. Atikûrûtha
bûra eerirwe n'îthe.

Kagwîra n'aathîkagîra aciaari baake
mûno. Raitha woone n'akûthaambia into,
îndî Mûtugi eerirwe akarîthie aarega. Ika
akûrûura maembe maîthi.

Mûciari wake n'akûtheta n'ûntû Mûtugi
atirarûtha bûra eerirwe. Mûciaari
n'athûrûraga rîra mwana
atakûmwaathîkîra.

N'akenaga rîra mwana akûmwaathîkîra.
Ngai n'akenaga rîra twaana tûkwathîkîra
aciari baao.

(Akorosai 3:20, Aebeeso 6:1- 3)

Bûra nkaarûtha.

Nkaathîkagîra aciari baakwa na
nkabatîiyaga.

Wîra ya biûria.

1. _____ n'aakenagia aciari baake.
(Mûtugi, kagwîira)
2. Yiesû n'aathîkagîra aciari baake.
3. Weta magiita mara wathîkîre na mara
ûtaathîkîra aciari baaku.

D. Mawatho ma mûciî na cukuru.

Mawatho i matûteethia kûrûtha mantû
maagîru tûrî mûciî kana tûrî cukuru.



Ûyû i Kîrema.

Kîrema athiîte Kanicaani kûromba Ngai.

Ncumatatû akaathi cukuru.

Ncumapiiri Mûrîmi aûkaga rûkîirî

akathaamba meetho,

akanyua ûcûrûakathi kanicani. Nyuma ya

kanica

eenûkaga kere agacencia nguo,
akarûgûrîra mbûri akathi kûrîthia.

Cukuru kûrî na mawatho. Arutwa
babatîirue bakinya cukuru rûkîrî bagaciata
na nkengere yariingwa bakathi iraciini
kûthooma. Batibaîrue baceererwa,
bayoga kana beekîra nguo cia mûciî.
N'ata bûngî atabatîirue arûtha?

Thooma: Arooma 13:1

Ngai n'akwenda twathîkîra atongoria ba
thirikaarî na ba kanica, aarimû, aciaari na
arûngamîri bonthe n'ûntû n'we
abathuurîte.

Bûra nkaarûtha.

Nkaaromba Ngai aanteethie kwathîkagîra
mawatho mûciî na cukuru.

Wîra ya biûria.

Andîka mantû mataano mara ûbatîirue
ûrûtha mûciî.

1. _____ 2. _____ 3.

4. _____ 5. _____

E. Kwathîka cukuru.



Arutwa baba baugîtie kîraciini bakîathîkîra
nkengere.

Arutwa bara baremu nwaka bakari nthî
nkengere yaringwa ya kûthi kîraciini.

Aana rîra barî cukuru bathiingataga mûno
bûra nkengere îkûbeera. Îndî kûrî aana
baangî rîra nkeengere yariingwa
barûthaga kînyume ta:-

-kûthi kîorooni bantû a kîraciini
-kûthi na mbere kûthekania kana kuugia
bathiîte kwîbitha.

Bibiria îtûrutanaga kwaathîkîra anene
beetû. Ngai n'akenaga rîra tûkwathîkîra
atongoria. Wana kinya aarimû beetû i
bakenaga rîra tûkwathîkîra mawatho ma
cukuru.

Bûra nkaarûtha

Nkaathîkagîra mawatho ma cukuru
rîonthe.

Wîra ya biûria.

1. Ngai eendaga twathîkîra aar_ m_
beetû

2. Rîra tûkûyoga kîraciini i tûtûmaga
aarimû beetû
B_ th_ r_

GÎCUNCÎ KÎA BINAANA.

KÎONGO GÎA KÎTHOO MO: Wîra

A: Wîra cia Yiesû

I tûrutaga ngûgî inyiingî mûno tûrî aana.

Ngûgî inu

i ta:-

-kûrîithia, kûthooma, kuuna nkû

-gûtaa rûûyî na ciingî i nyiingî.

Ngûgî inu n'itûteethagia mûno mîtûrîreeni
yetû.

Yiesû n'aarutaga ngûgî. N'aarî mwarîmû
ûmwega. N'aateethagia îthe ngûgîni.

N'ooragia aayie mîrimo na
n'aariûkagia antû bakuû. I bwega kûruta
ngûgî.

Bûra nkaarûtha.

Ngateethagia aciari baakwa kûruta ngûgî.

Nkaaruta ngûgî na inya mûno.

Wîra ya biûria.

1. Gweta ngûgî itaano ira aana barutaga.

2. Yiesû arî mwana aarutaga ngûgî i rîkû?

B. Wîra cia mwana mûcîî.

Gweta ngûgî ira aana barutaga mûcîî.



Gweta bûra tûrutaga ngûgî inu îrî
mbicaani

Aruagina ba Njosebu îkûmi na ûmwe i
baarîithagia mbûri na ng'ondu. Bibiriani i
tûthoomaga Musa n'ateethagia aarî ba

Njethiro kûnywithia mbûri.

Ririkana Ngai n'akenaga rîra twateethia
aciari beetû kuruta ngûgî.

Wîra ya biûria.

1. Mûthonue wa Musa eetagwa

2. Gweta ngûg6i inya ira aana barutaga

mûciî.

a. _____ b. _____ c _____

d. _____

C. Ngûgî cia mwana cukuru.



Arutwa baba barîruta ngûgî mwanya
mwanya cukuru.

Raitha mbicaani. Ngûgî ira aana

barûthaga cukuru i ta:-

-gûciata

-kûthooma

-kûthaambia kîraci

-gûceengia nyaki

-gûtûrîria mîtî rûûyî

Ndanieri n'aiyî kûthooma na kwaandîka.

Wana Musa n'aiyî kûthooma na
kwaandîka. Musa aatuîkire muntû û
mûnene. Kwoogu kûmenya kûthooma na
kwaandîka i kiegwa kuuma kîrî Ngai. Ngai
n'eendaga tûrûta ngûgî ya kûthooma
cukuru na inya mûno.

Bûra nkaarûtha.

Nkathooma na inya mûno cukuru.

Wîra ya biûria.

Nkathooma m_b_k_ maakwa cukuru.

D. Gûtuïka mûruti ngûgî mwitîgua.



Aana baba bagûciata n'eetîgua cukuru na

mûcîî.

Bara batarî eetîgua nabo bakaraga nthî

rîra ngûgî ikîrutwa cukuru na kinya mûcîî.

Aana bara bakûruta ngûgî i bo aana
eetîgua.

I kwarî na aruti ngûgî bathatû. Mûnene
wao n'abanenkeere taranta cia thaabu.

Umwe aanenkeerwe itaano n'we
oongeera ciingî itaano, cionthe
aacookeerie mûnene taranta ikumi.
Mûnene aakena mûno.

Wa baîrî aanenkeerwe taranta ciîrî.
Ongeere ciingî ciîrî na aacookeria mûnene
irî taranta inya na mûnene aakena mûno.

Wa bathatû aanenkeerwe taranta imwe.
Aacookiirie taranta wa ïra imwe eetwe i

mûnene.

Aarî kîthao mûno. Mûnene aathûûra n'we,
amûtuunya yo aanenkera muntû ûra aarî
na îkûmi.

Ngai n'eendaga tûbaitania kîra atweete.

Ngai n'akenaga rîra twaruta ngûgî na inya.

Ngai atikenaga rîra tûrî na ûthao.

Ngai akenaga nkûrûki rira twatuîka
eetîguia.

Bûra nkaarûtha.

Ngatûmîra kîra Ngai ampete na ûûme.

Wîra ya biûria.

1. Mûruti ngûgî wa mbere eerwe taranta

2. Mûruti ngûgî wa baîrî eerwe taranta

3. Mûruti ngûgî wa bathatû eerwe

taranta_____

GÎCUNCÎ GÎA KEENDA.

KÎONGO GÎA KÎTHOO MO: Yiesû Kîristû mwana wa Ngai.

A: Mûtûûrîre wa Yiesû arî mwana mûciî na kanicani

Thooma: Ruka 2: 51, 2: 41-49.

Yiesû aaciaarirwe ta twana tûra tûûngî.

Aakûra akiendagwa n'antû na Ngai.

Yiesû ateeyia arî mwana ntugû kinya

îmwe.


N'aathikagîra aciari baake na n'eendeete

antû bara baangî. N'aateethagîria îthe

ngûgî ya gûtuma na mbaû.

N'aaroombagîra na akooria aayie.

Wana niū nkaathîkagîra na gûtethagia
aciari baakwa.



Kînyamû arutaga ngûgî ya gûtuma na
mbaû.


N'atumîrîte aciari baake itî na meetha.

B. Yiesû arî kanicani. Ruka 2:41-49

Tûthiyaga kanicani kûromba na
gûkumithia Ngai.

Yiesû n'aathiire kanicaani arî na aciari
baake.

Arî na ûkûrû bwa mîanka îkûmi na yîrî.
Baathiire kanicaani Njerûcaremu. Yiesû
n'aatigirwe kanicaani n'aciari
baake. Aciari bake batigirwe
bakîmûceragia gûntû kuunthe. Aciari bake
baamwîthîre kanicani athikîrîtie arutani
ba kiugo kîa Ngai. N'aathîkîre aciaari
baake beenûka bwa kwao Nacarethi.



***Yiesû akari nthî kanicani athikîrîtie
gûkîrutanwa***

Wîra ya biûria

1. Nyomba ya Ngai yîitagwa

2. Yiesû akîthi kanicani aarî na ûkûrû bwa
mîanka

3. Yiesû aakûrîre ntûûra ya

(Njunda, Nacarethi, Garirii)

C. Kûbaatithua kwa Yiesû

Thooma Mathayo 3: 13- 17

Rîra antû beetîgia i babaatithagua

kanicani.

Kûrî na njîra i nyiingî cia kûbaatithua

kanicaani ta:-

Gûtûûrîrua rûûyî, na gûtoombekwa

rûûyîni.

Nwa ûbaatithue ûrî mûkûrû kana ûrî
kaana.

Muntû abaatithua n'eyagwa rîtwa rîyerû
ta:-

Njosebu, Petûrû, na maangî maingî

1



2



3



1. Kûbaatithua na njîra ya gûtoombekwa

rûûyîni.

2. Kûbaatithua na njîra ya gwîtûûrîrua

rûûyî.

3. Yiesû akîbaatithua i Njoana na njîra ya

gûtombekwa muurooni wa Njorondani.

Yiesû abatithîrue muurooni wa

Njorondani.

Yiesû abaatithiirue i Njoana mûbatithania.

Twabatithua tûtuikaga biûmbe biiyerû

meethoni maNgai. Ngai n'aakeneere

ûbatithio kwa Yiesû.

Nkaabaatithua ntuîke Kiûmbe kîeyerû na

mpegwe riîtwa rîiyerû.

Wîra ya biûria:

1. Yiesûaabatithîirue muuroni wa

2. Twabaatithua tweyagwa _____
rîyerû.

3. _____ n'weaabatithiirie Yiesû.

D. Athingati ba mbere ba Yiesû.

Thooma: Njoana 1:35-42, Mathayo 4;

18-22,

Ruka 5:1-11

Yiesûaarînaarutwaîkûmi na bairî. Baari
athiingati

baake. Baarî acoore baake.

Athiingati ba mbere ba Yiesû baarî Petûrû

na mûruagina Enderea. Njoana na

Njakubu baarî muntû na mûruaguna na

ibo nthaka cia Sabendi.

Arutwa ba Yiesû bathiyanagia n'we

akîbarutanaga.

E. Yiesû aathuura arutwa îkûmi na baîrî.

Thooma Mathaayo 3:13- Mathayo 9:9-

13,

Njoana 1:43-50, Ruka 6:12-13

Yiesû aathuurire arutwa îkûmi na baîrî.

Abathuurire kaingo abarutana

bamûteethagîria.

Arutwa babu baarî:-

- 1.** Simioni petûrû,
- 2.** Njakubu mûruagina wa Njoana,
- 3.** Enderea,
- 4.** Piripû,
- 5.** Bathoromayo,
- 6.** Mathayo,
- 7.** Toma,
- 8.** Njakubu wa Arubayo,
- 9.** Thandayo,
- 10** Simioni mûkanaani,

- 11.** Njoana muruagina wa Njakubu,
- 12.** Njundaci mûcikariota ûra akunyanîire Yiesû.

Ngûgî ya kûruta:

Thooma na ûgweete mariîtwa na arutwa
îkûmi na baîrî ba Yiesû.

F. Yiesû aariûnga mûciî wa Simioni

Petûrû.

Ruka 4:38-40


Yiesû n'aathiire kûriûnga muciî wa ba
Simioni Petûrû. Mûthonue wa Simioni wa
mûka n'ayîitue kûbîyanîra mwîrî. Yiesû
n'amworiirie amwe na antû bangî baingî.
Yiesû n'ooragia antû bara baayie.

Rira twayagua Yiesû n'atworagia.

Yiesû n'aariûngagîra aayie
akîbarombagîra na kûbooria.

Bûra nkaarûtha:

Nkariûngagîra aayie nkîbarombagîra.



*Yiesû akîroombura muntû aarî ûmwayie
gîtandaani.*

G. Yiesû Kîristû N'aarombaga.

Thooma: Maariko 1:35-39, Ruka 22:39-46

Itûrombaga magiita maingî ta:-

-tûkîrîa irio, twaûkîra rûkîrî, ûtugû

tûkîmaama

-tûkîanjîria ngûgî cietû

Yiesû kinya wee n'aarombaga magiita

kwa magiita.

N'aarombaga rûkîrî, ûgoro, na


n'aarombagîra mantû maingî.

kûroombera irio mbere ya kûrîa



kûroomba

ûkîmaama



Yiesû akîoomba

Ririkana

1. Kûromba i kwaranîria na Ngai
2. Yiesû n'aaroombaga magiita kwa
magiita.

H. Yiesû n'aarekanagîra meeyia

Kagiita Kamwe i tûbîtagîria acoore beetû.

Rîra twabitanîria tûbatîirue tûromba

ûrekeri na tûrekanîra. Muntû n'akenaga

aarekerwa mabîtia
maake. Ngai n'akenaga twarekanîra
mabitia. I bwega
kûrekanîra kaingo naati tûrekerwa.

Yiesû n'ooriirie kîonje ntûûraani ya
Kaperinaumu.

N'amûrekeere meeyia maake.



Kîonje kiirîrîtwe Yiesû kaingo akîoria.

Ririkana:

1. Yiesû n'aarekanagîra meeyia
2. Yiesû n'ooragia aayie ba mîthemba
yonthe.
3. Tûrombage Ngai atûrekagîre meeyia
meetû
4. I bwega kûrekagîra bara bangî
batûbîtîria.

Bûra nkaarûtha

Nkeerutanîria kûthiingata Yiesû n'ûntû
narûthaga mantû meega.

Wîra ya biûria:

1. Kanica i nyomba ya -

2. Yiesû _____ magiita maingî¹
(nakaanaga, n'aroombaga)

3. Yiesû n'ooriirie mûthonue wa

4. Yiesû n'aarekagia antû _____
mao.

5. _____ n'aakunyanîre Yiesû
amwendia mbia.

GÎCUNCÎ GÎA ÎKÛMI.

KÎONGO GÎA KÎTHOOMO: Gwîtîgîrîka na wîtîgîka


:

A. Ageni mûciî wetû.

Kwambîria:

Rîra tûrîna ageni wetû mûciî i tûkenaga
mûno.

N'ûntû ntugû ïnu tûrugaga irio birî mûrîo
mûno, ta mîgaate, chabati, Ngûkû na caai.



Ageni beetû barî mûciî. Barî methaani.

Bonthe i bagwaatirwe ûgeni n'aciari
beetû.

Twinthe tûrîrîa tûrî amwe na ageni beetû.

Ageni bamwe i batûthokagîra na into ta
conda, mîgaate, cukarî, na nderemende.

I tûbatîrue gwîtîgîria na kûthookia ageni
bwega bara baayaga gûtûriûngîra kana
gûtûkeethia.

Rîra twarugûra cukuru nyuma ya rûûtha
aarimû beetû
batûkeethagia na gîkeno n'ûntû i tûkarîite
mûno tûtoonana nabo. Twîgagua tûkari ta

ageni kîrî bo.

Mûgeni akaragwa n'we na nthoni i mbega.

Aarimû bageni i bareetagwa cukuru.

Rîra tûrî na aarimû baageni, itûkenaga

mûno na tûkeenda kûbathikîria na

kûbaathîkîra mûno.

Bibiria n'îgûtûrutana kûthookia ageni.

Yiesû n'ariûngire kwa ba Maria, Mariitha

na Racaarû

Aibirania 13:1-2)

Ririkanagaani kûgwata antû ûgeni n'ûntû

n'araika.

Bûra nkaarûtha:

Nkagwataga antû ûgeni

Nkarûmagia ageni biakûrîa na bîakûnyua.

Wîra ya biuria:

- Weta antû mwanya mwanya bara

babûriûngagîra mûciî wenu.

-Coora mbica ya mûgeni arî mucîî wenu.

B. Mîkûrûkani na mîbuananîre ya antû

ba mucîî.

1 Akorintho 12:4-26



Antû baba batibuaneene na batiganeene.

Antû batibuaneene na batiganeene. Kûrî antû baraaya na baakubî. Kûrî baanoru na baacege.

Kûrî antû beendaga gûceetha na kûrî bangî bakaraga bakirîrîtie kii. Kûrî baakûrû na kûrî bionje .

Niû ntiendaga gûtûmwa thokooni mûno.

Mwaraayia ûra eetagwa Kaûra na mûruaayia ûra eetagwa Nthiga ibendaga gûtûmwa thokooni mûno, kaingo barîa ndigû. Mbendaga gûkara mûciî rionthe kaingo wakamwa nkuundua īria nyua.

Antû batibuaneeene bonthe na batiendaga

ûntû bûmwe bonthe.

Maria na Mariitha baarî muntû na

mwaragina.

Batibuaneeene kwa njîra inyiingî.

Mariitha eendeete kûruta ngûgî. Maria

eendeete kûthikîria ngono.

Ngai eendaga twonaga maweega ma

bara baangî.

Atiendaga twîbenda akî. Ngai eendaga

twînyiia.

Twîtîgagîrieni antû bonthe ba mûcîi wetû.

Ngai atûnenkerete biewa mwanya

mwanya.

Bûra nkaarûtha.

Nkeenda antû bonthe.

Ngacookeria Ngai nkaatho n'ûntû bwa
ageni.

Wîra ya biûria.


1. Antû batibuanene b_ nth_
2. Antû bamwe i banoru bara bangî i
ba_ c_ g_

C. Gwîtigîria antû ba mûciî wetû

Ndeni ya miciî yetû ikwîgagua kûrî na antû

barî na moobatû mwanya mwanya.

Ikwîgagua kûrî na bamwe bakûthua,
bangî batoonaga, na bangî barî
ûthao mûno.



Kagiita ga kwegwa ngûgî, aciari
batweyaga ngûgî kûringana na bûra
tûkûûmba. Rîmwe nwa ûnenkerwe ngûgî
ûkoona taka ûkwoneerwa.
Îndî itûbatîrue twîtigîria
bara bangî kûringana na woti bwao n'ûntû

Ngai n'we atûumbithagia kûruta ngûgî.

Bibiria îtûrutanaga gûtîiyana na
kwendana. Wa muntû n'abatîirue wîtîgîria
ûra ûngî kûringana na bûra
aûmbîitwe.

N'ûntû twinthe tûtietwe biegwa bimwe
îndî Ngai n'we
eeyanaga bionthe.

Bûra nkaarûtha

Nkeendaga na mbîtîgîirie gûkaranagia na
antû bonthe ba mûciî wetû.

Ngûgî ya kûrûta.

Ina karwîmbo gaka:

Taranta ciumaga îgûrû i baangîitwe

.....

D. Witîgia Ngai na bara baangî


Aciari i batûcwagîra into bira twendaga

mîtûrîreeni

yetû ta:-

-nguo, irio, ûraaro, na bingî.

I twîtîgîtie aciari beetû mûno.



I bwega gûturia maru na kûromba Ngai
magiita monthe.

Ngai n'atûmenyagîra moobatuuni meetû
monthe.

Rîra tûkûromba tûbatîirue wîtîgia Ngai
agaacookia maromba meetû, wata bûra
twîtîgagia aciari beetû moobatuuni meetû
ma kînthîgûrû. Bara beetîgagia Ngai i

bakenaga rîonthe.

Bûra nkaarûtha

1. Ngaacookagîria Ngai nkaatho n'ûntû
bwa kûmbingagîria moobatû makwa.
2. Ngeetîgagia Ngai marombaani makwa.

Wîra ya kûrûtha.

1. Coora mbica ya antû bakîrombaga
2. Rîra tûkûromba twonanagia w_t_g_o
bwetû kîrî Ngai.

GÎCUNCÎ GÎA ÎKÛMI NA KÎMWE.

KÎONGO GÎA KÎTHOOOMO: Kûringithua
na kûgaana into.

A. Kûgaana into bietû.

Thooma: Ngûgî cia atûmwa 4:32-35, 20:35

Njakubu 2:14-17

Kwambîiria.

Rîra tûrî mûcîî i tûgaanaga into mwanya
mwanya na antû ba mûcîî. Rîra tûkûgaana
into na bara bangî twonanagia wendo.

Tûrî mucîî kana cukuru i tûgaanaga into
bietû na antû bara bangî.

Ngai n'akenaga rîra tûkûgaana into na

bara baangî. Ngai n'athaarimaga antû
bara beeyanaga na wendo. Athingati ba
Yiesû i bagaanaga into biao ta nguo na
irio. I bwega antû ba Ngai kûgaanaga into
biao.

**Gweta into bira gûumba kûgaana na
antû bara bangî.**



Antû ba mûciî bakîrîa irio barî amwe

Ririkana:

Nkagaana into biakwa na antû ba mûciî
na acoore baakwa.

B. Kaîyî kara kaagaanire irio na antû.

Kamene n'aayaga na makie cukuru ntugû
cionthe.

Mûtîria ataayaga na gîntû n'ûntû bo i
bagîiyaga na yûûra kwao. Kamene
n'aakenaga mûno kûgaana makie make
na Mûtîria.

Ntugû îmwe Yiesû agîtûmagîria antû,
n'ooriirie bara baarî baayie. Indî ûgoro
antû i baabûûtire mûno.

I kwarî na kaîyî kaarî na mîgaate îtaano

na tûkûyû

twîrî. Yiesû abithûkia abiroombera na

aacookeria Ngai nkaatho. Irio biaingîa na

arutwa bagaîra antû.

Antû barîa na babaa. Biatigara ikaabû

îkûmi na biîrî.

Antû bara baarî oogo baarî antû arûme

ngiri itaano

tutagûtara aka na twana.

Ririkana:

Rira tûkûgaana into bietû na bara bangî
ibakenaga na Ngai n'akenaga.



*Mûtegi n'akûgaana ikûyû na Kayîra.
Kamene n'we n'akûgaîra Mûtîria makie.*

C. Rûgono rwa Tabitha. Ngûgî 9: 36- 42

Ntugû ìmwe ya Ncuma mooci, Mûtîria na
Gîtonga bathiîte i boonire Njerû atweete
mûthithiini agîtua ûthithi.

Njerû n'abariatiirie na aarûka mûtîni na

aunîka njara. Mûtîria na Gîtonga
bakwîgua akîrîra, i baugiirie bamûûkîria na
bamwoga njara. Baacooka bamûkamata
bamwira mûciî kwa aciari baake.

Aciari ba Njerû i baakenire mûno na
baacookeria Mûtîria na Gîtonga nkaatho.

I kwarî na mwekûrû ûmwe eetagwa
Tabitha. Tabitha nwa we eetagwa
Ndorokaci. Aatûûraga taûni yeetagwa
Njopa.

Aarî mwîtîgîri na n'eendeete antû bara
bangî mûno.

Aateethagia mûno twana tûkîa

na ntigwa.

N'aarutanaga eekûrû ba ntigwa gûtuma
nguo.



Ntugû ìmwe Tabitha n'aayiirue na aakua.

Antû bara aateethagia i baarîrire mûno.

Eetîgîri baatûmana Petûrû aaya

aarombera Tabitha na Ngai amûriûkia.

Antû i baakenire mûno na beetîgia Ngai.

D. Yiesû n'eegagua na

akathikîria/gûtarana na thiina cia bara

bangî Ruka 8: 40 - 42, 49 - 56

Magiita maingî antû i baagwatagwa i
mathîina.

I twagîrîte gûtarana na thiina cia bara
bangî keenda tûbateethia bûra tûkûûmba.

Yiesû n'ataranaga na thiina cia antû
mûno.

Îgiita rîmwe kaarî ka muntû eetagwa
Njairû i kaayiirue mûno na gaakua.

Yiesû akwîrwa n'aathiire akariûkia.

Ririkana:

Yiesû n'eendeete antû bonthe.

Yiesû n'atûmenyagîira.

Mûcoore ûmwega n'endaga gûteethia
acoore baake. Ngaakobia Yiesû kwenda
na guteethia antû bonthe.

Ngûgî ya kûruta

1. I thîîna irîkû ciûmba kûgwata acoore

beetû?

2. Tûûmba kûrûtha ata kaingo tûbateethia

thîînaani inu?

Wîra ya biûria

1. Yiesû aarerire antû ngiri _____ na
mîgaate îtaano
na tûkûyû twîrî.
2. Tabitha atûûraga Taûni yeetagwa Nj-p-
3. I bwega gût--thi- bara bangî. Riîtwa
rîingî rîa Tabitha i _____
5. Yiesû _____ kaarî ka Njairû karî
gakuû.

GÎCUNCÎ GÎA ÎKÛMI NA BIÎRÎ.

KÎONGO GÎA KÎTHOOMO: Ûrutwa

A. Ücoore.

Mariîtwa ma acoore baakwa.

Ndeni ya cukuru twana itwîthagîrwa

tûkîthoomagîra amwe.

Wa mwana arî na acoore bara akaranagia

nabo na kûruta ngûgî barî amwe ta:-

kûrîma, kûthooma, na gûciata na

kûthekania.

Gweta acoore baaku rira ûri mûciî.



Twana tûkîthekania amwe

Yiesû n'eendeete twana tûniini. I mûcoore
ûmwega.

Yiesû augaga mûcoore ûmwega
n'ateethagia muntû

rîonthe rîra arî na ûbatu.



Yiesû agweete kaana

Mûcoore ûmwega n'ûra arî na wendo bwa
gûteethia rîonthe ara kûrî na ûbatu.

Bûra nkaarûtha.

Ngateethia aciore bakwa rîonthe.

Wîra ya biûria.

1. Coora mbica ya mûcoore waku na
ûmîgemie.
2. Tûteethanagie r_ onth_

B. Bûra ndûthaga na acoore baakwa mûciî na cukuru.

Naara mûciî kûrî na maama, baaba, na
twana twetû.

Magiita maingî tûrutaga ngûgî tûrî amwe.



Antû ba mûciî ûmwe n'aacoore.

Ndeni ya cukuru, twana tûra tûrî na
ûcoore tûthekanagia tûrî amwe.

Njosebu n'eendiirue Misiri n'aruagina.

Aruagina batamwendeete. I
bamûmeneete. Nyumani kwagîa na yûûra
nthîgûrû yao.

I bathiire kûthûgûra irio noogo. Bakûthi i
beethîire Njosebu arî mûnene baamaka.

Njosebu n'aabarekeere na batuïka acoore
kaîrî abeeta batûûra n'we Miisiri.

I baatûûrire ûtûûro bwega amwe.

Kûrekanîra i gûtûmaga tûtuïka acoore
beega mûciî.

Ngai n'eendaga tûrekanîra na tûtûûra tûrî
acoore.

Bûra nkaarûtha.

Ngacookagîria Ngai nkaatho n'ûntû bwa
acoore bakwa.

Ngûgî ya Kûruta

Coora mbica ya Njosebu na aruagina barî
Miisiri.

C. Ngai ta mûcoore wetû.



Mbica ïno îrionania mbi?

Mwarimû na arutwa kîeniini bagîceetha

Tûkenagia aarimû beetû rîra

twabaathîkîra.

I tûkenagia aciari rîra twabaathîkîra.

Rîra twaathîkîra aarimû na aciaari

batuîkaga acoore beetû.



Ûyû n'Îburaîmu. Îburaîmu aarî mûcoore

wa Ngai. Aarûthaga bûra Ngai amwîîraga.

N'aathîkagîra Ngai.

Bûra nkaarûtha.

Nkaathîkîra watho bwa Ngai na ntuîke
mûcoore wake.

Wîra ya biûria.

1. _____ n'athîkîire Ngai

2. I tûbatîirue kwathîkagîra ac_ ar_ na
a_ r_ m_ kaingo batuîka ac_ or_ beetû.

GICUNCÎ GÎA ÎKÛMI NA BITHATÛ

KÎTHOOMO: Yiesû mwana wa Ngai

A: Gîtûmi gîa pacaka

Pacaka i mbi?

Thooma Ruka 22:14-20

Pacaka i gûkeneera kûriûka kwa Yiesû
kuuma kîrî akuû. Îgiita rîa pacaka antû i
bainaga nyîmbo cia gûkumia mwathani,
kûriûngira acoore, kûnenkanîra biewa na
kûbaatithua kwa aana baaniini. Kinya antû
i bathiiyaga kanicaani.

B.Yiesû mûcoore wa twana.

Thooma Mathaayo19:13,15, Njoana

15:14

Yiesû n'endeete twana tûniini mûno.

Aaneenkanîre ngerekano ya bara

bakoonâ ûnene bwa îgûrû beegûe bakari

ta twaana tûniini. Yiesû n'airîrwe twana

tûniini atwaigîra njara atûthaarima.

C. Gûkua na kûriûka kwa Yiesû kîristû

Thooma; Maariko 15:33-47, 16:1-8

Yiesû aayire nthîgûrû aakua n'ûntû bwetu.

Nyuma ya ntugû ithatû n'ariûkire na eetia

îgûrû kwa îthe. Yiesu aambirwe

mûtharabaani. Gîkuû giake kîarî na kiao
mûno. Njosebu wa Arimathea n'aroombire
mwîrî wa Yiesû athi kûthika. Nthiko ya
Yiesû yaarî rwaraani rwa yiiga.

Ririkana

1. Yiesû aakuire n'ûntû bwa meeyia
meetû.
2. Yiesû endeete antû bonthe.

Uga na ûcookeerie migambo îno na kîongo.

“ Kîristû aakuire n'ûntû bwetû kaingo
tûtûûrania n'we nwigue tûri mwoyo kana
tûrî baakuû rîra agaacooka.”

1 Athesaronike 5:10

Bûra nkaarûtha

Ngaatuika mûcoore wa Yiesû rionthe.

Biûria.

1. Gûkeneera gûkua na kûriûka kwa Yiesû
gwîtagwa _____ (mbathindî,
pacaka, thigûnkû)
2. Tûbateerue tûkara ta _____
tûniini.
3. Yiesû aariûkire ntugû ya _____ (5,3,1)
4. Nthiko ya Yiesû yeenjîltwe _____
5. _____ n'aroombire mwîrî wa Yiesû
aathika (Njocebu wa arimathea, Njudaci,
Njoana)

NDIINI

IBUKU RÂA MÛRUTWA KÎRACI 1

First Edition, 2011
ISBN: 9966-00-219-7

Published
By
BTL (E.A.)
P.O Box 44456 Nairobi, Kenya
© BTL, 2011

Cover Designer: P.N. Kanamplu